

嘉興府志卷四十

人物志

列傳

義行

平湖縣

明

陸宗秀宋樞密副使旋吉九世孫有至行與弟宗達宗俊
 友愛甚篤永樂甲辰應賢良詔與陳繼等二十二人徵
 至京師會仁宗御極引見便殿宗秀方巾布袍舉止中
 度上異之問曰如何則天下太平宗秀頓首對曰皇帝
 親賢納善大臣秉公持正自然太平上悅曰好言語留



京師月餘以疾辭賜銀幣還正統五年歲大稔出粟麥
二千九百餘石助賑賜敕褒美表其門曰尙義子珪見
後

孫佐鍾鳴遠潘璧正統五年饑佐等與陸宗秀各出穀麥
二千石助賑朝廷勞以羊酒旌爲義民復其家三年

陸平字國平好施與處事有斷里有訟者爭就質以解洪
熙改元歲大饑民食草木平出粟作粥食餓者多全活
正統壬戌至景泰乙亥屢饑前後捐粟五千餘石麥八
百斛佐有司賑濟同時有陸平世陸祥者亦以輸粟助
賑詔並授散宦旌其門曰義民

江濟字伯與宋丞相文忠萬里之裔正統五年敕各省府
州縣置預備倉民能出粟佐官者旌其義復其家濟傾
家得粟二千一百五十餘石輸官壘書褒獎表其門曰
尙義

陸珪字廷玉嘗代輸一邑賦以寬民力景泰六年饑疫珪
與弟瑜瑾共出穀五千餘斛賑之詔授珪廸功郎兄弟
四人皆賜宴光祿珪以德義信於鄉鄉人有不平事皆
就質不至官府珪嘗與沈昊共建學宮落成日知縣羅
榮釃酒祝之曰願兩家世世科第不絕果如所祝

屠機字汝敬歲饑兩輸粟賑濟例得仕者階服辭弗受嘗

雪夜過淞江聞葦澤間有呻吟聲視之見一人手足被
縛命舟人負至舟解縛易衣以火溫之久始蘇知爲句
容商人被盜劫者留居踰月辭去尋以百金酬不納以
子勲贈刑部尙書

沈濬字惠水先世自武康僑居東泖至濬徙石莊爲人倜
儻有才重然諾喜賓客明正德間爲文思院大使以事
忤劉瑾被杖下獄欲置之死有韓松鄰者與濬善時同
郡項忠屠勲皆在朝松鄰詣泣白其寃得釋瑾恨未平
將復杖松鄰泣請曰繫獄數月再杖必死愿以身代濬
得歸未幾卒

陸宓字子深御史琳子性孝好行善歲祿捐私蓄助賑家
落質錢以施無倦色著有捫心錄運盤餘鈔

俞錦字克昌好義自筋從子彬貧析產過於己子故人金
杰死無以殯其子坤就錦鬻田計所需給之焚其券戚
黨十餘家藉以舉火嘉靖間築縣城知縣殷廷蘭以其
居當城趾欲廣數丈請所值錦曰城以衛民可以一人
居煩縣官費乎卽自毀庭寢二十餘間知府劉懋顏其
門曰義門

張濤字悅清有隱德娶婦盲相敬如賓蘆瀝場大使逋官
帑二百金繫郡獄濤代償之越人駱某好學貧甚以勾

軍匿濤所得脫後貴以百金酬不受友人趙端嘗貸于
濤及償攜七歲孫漢同往濤器漢反所償金以佐讀書
後漢爲名臣

曹臬家貧館於某家夜有叩門者審之則處子也拒不納
明晨以他故辭弟早亡遺一女厚嫁之舅氏死周其養
孤

韓文字本質以吏員授羅浮倉官前官逋糧久繫獄文歎
曰三十金關一家命盡出所攜資代償得釋文六十無
子南雄知府貢珀贈詩曰捐金不惜緣無子垂老猶忙
爲有官此意只教知屋漏老天曾肯竟漫漫後果生子

相任通判贈文如其官八十餘卒

陸序字可松爲某所中坐死得雪後某坐他法序爲排解某愧服序嘗出粟米千石賑饑授七品秩子槐別見

馬瑀字朝儀弟珣運漕舟覆傾家償不足部使褚按治瑀詣代白得免有大猾誣知縣周某得贓萬計瑀上書撫臣得不坐歲被民多流徙瑀乞知府詳免是年稅卒減其半後贈參議子千乘孫維銘曾孫德灃俱另有傳

陸厘字載民博學隱居好施與歲饑戚黨貧者賴以舉火至鬻產不吝有司奏旌其義

陸基誠字存卿諸生戊子大饑傾困以周族戚爲粥通衢

食饑者復設冢地市棺收瘞路殍度大荒後必疫劑藥
以待已果獲全活甚衆

沈維錡字震躬諸生有才幹嘉靖丁巳倭警倉卒兵不得
集督撫胡宗憲設計誘降時倭屯沈莊衆莫敢往維錡
請獨往說之已大兵至勦之維錡實首功宗憲欲疏請
大用維錡固辭但奏免沈氏十年田稅

林雨字少巖僉事桂子值徐海亂產中落性好施與鄰里
藉以舉火弟病以產讓之從弟無歸者咸周之以貢授
溧水教諭遷代府子楚能承父志諸負券悉取焚之

陸杲字元晉以進士授刑部主事出爲漕運理刑與漕臣

忤會漕臣罷亦去官陸氏自唐宣公後爲巨族杲倡族
置田八百畝屬景賢祠歲收其入以周族人曰族田又
置田五十畝屬世德祠畀宗子供祭祀曰祭田設塾集
里族子弟置田二百畝以給稍廩曰學田宗族日繁更
徭不支置田三百畝分贍之曰役田嘉靖中島夷內寇
捐貲佐築城一縣賴之累贈刑部尙書子光祖光祚有
傳光宅見儒林

馬千里字伯良諸生歲饑請賑全活萬計遇人難必力救
季父珣無嗣迎養終其身課弟千乘不以家事累之弟
貴事兄若嚴父居恒靜坐一室左右圖書怡然自樂封

文林郎

沈維鈞字望洋嘉靖間連患旱蝗隨父塚設糜賑饑全活甚衆子民範字寅所有醇行不以子萃楨貴改其素萃楨爲奸黨所構民範曰小人所憎者君子我何憾萃楨另有傳

陸珂字子珍族黨有貧不能婚葬者悉周之輯格言勗子孫兩舉鄉飲不赴子文典字希堯歲饑捐貲設粥以食流民還遺金讓塔基田輸葬地樂善不怠一如珂嘗手書仁廉公勤四箴訓其子長庚後珂與文典皆以長庚貴贈布政使長庚另有傳

劉麟字子仁力學修行好施予三族賴以舉火者甚衆孝
李氏父老無依厚遺遣歸以孫廷元贈右都御史

過厚幼喪父事母孝父遺產爲兄蕩費僅有存者厚復讓
映取瘠從父槐無後厚以序承其祀所授千金分恤族
之貧者鄰人妾死被誣訟夜遺百金乞白寃却之及庭
鞫力辨得釋著有性理解子庭訓另有傳

陸橋字元建講性理之學工詩文族有景賢祠創立義田
橋力爲多著有石居集

馮伯禮字節之太僕卿敏功子敏功卒巡撫以下賻之金
伯禮遵遺命以築寶應護堤事見敏功傳與妻查事母

孝周恤貧困無所吝後卒于燕子洪業字茂遠事母能
養志母臥樓火洪業冒烈焰負母出穎焦著有易羨睡
庵六書耘庵彙箋

施應埏字士和少時代昆弟繇役建平往諸議嘗路拾遺
金還其人贅于曹曹富無子曹卒應埏視含歛哭之去
貲悉歸曹族喜施予不問家人生產以子鳳來貴贈大
學士

陳增字進吾貢生少英敏有才名屢試不得志閉戶著書
學宮燬捐貲獨建華亭徐文貞階表其墓

郭日乾字懋學孝子球子諸生嘗客長安友人陸萬境死

於道負之歸旅邸學使蘇濟旌曰尙義真儒著有青蒲
草元經史參同諸書以子紹儀贈御史

陸懋學孝友敦族誼倡立祭田子又機孫上瀾別有傳

倪維城字北鑰諸生少墾於陸與妻弟長庚相砥礪如嚴
師蘆瀝場竈戶官吏腴削不聊生維城與趙志奎等上
書鹽使者釐剔之子鍾瑞見下

陸瑞銓號宇平諸生父傳教少貧嬰患難深自刻厲起其
家訓子孫爲善瑞銓生而好義值歲荒平糶煮粥全活
甚多族繁衍或不能舉火捐田入宗祠分給之故人子
無所依輒爲收養毘陵舊族有母子漂流自鬻爲傭者

爲贖而歸之子之祺有傳

倪士顯字慶雲家貧性好施助戚族婚代鄰人償贖身值友許某夫婦無子老無所依生養死葬之子虬見下

張冲元字完初性誠樸嘗至湖州以物付質庫及贖歸發篋檢之浮三百金亟往還之後家漸饒歲大饑出穀千餘石助賑建始祖忠獻祠于蒹葭園置田贍族以季子治洪贈鴻臚寺序班長子長生諸生性敦厚不屑屑計生產逋其租者恒置勿問舉鄉飲

葉方宸字遇之天啟乙酉舉人與兄方寰樂善好施里中稱葉氏二長者

趙科字南泉貢生崇禎間歲大祲捐粟以賑縣令旌之

曹繹祖字之采諸生崇禎辛巳大饑出粟三百石以賑子
五長穎洙字系宣天啟丁卯舉人官永豐教諭次穎泗
字仲宜崇禎壬午舉人鼎革後捐金贖族衆羈繫者姪
孫元家監生敦品行

曹鐘鳴字洪聲戚屬朱某以田質金後請售鐘鳴曰不可
子之家數口賴此以生不索金而歸其券

過銘盤字伯新廷訓子崇禎庚午副榜才名重公卿間庚
辰歲饑建平糶議貧民賴之縣有利弊直言無顧忌

倪虬字六元負才重氣節縣中徭無定律正差雜泛率脫

豪右科貧弱虬釐剔之爲民請命撫臣善所陳條議著
爲令著有雲林集新安三楚記遊

沈紹閭字巽仲歲貢生葺宗祠廣祭田以事先贍族

薛仲猷推官振猷弟性友愛讓遺產捐蠅螟濶田作漏澤
園

國朝

劉濰恒字滌凡諸生乙酉縣被兵死者道路相枕藉濰恒
偕從子棕率僕從收瘞至一千四百三十七人時河畔
無行舟炎穢蒸灼濰恒出入屍中無所忌巡撫聞其義
欲上聞以旌辭

李慶乙字秋水少孤貧力學入籍海鹽後投牒罷諸生改名杜字龍門友人郭襄圖以事繫獄慶乙周其家中夜奔至獄左右之郭亡命吏捕慶乙榜掠下獄戒獄卒偵所與勞苦人欲盡羅織之慶乙裹創僵臥不爲動會有援者得釋歸歸三日卒給事馬培源銘其碣曰義友李君之墓

倪鍾瑞字青翟舉人性溫厚有度嘗有人夜匿其家家人駭逐鍾瑞曰無庸徐詢之知爲追呼所迫遂代之納且厚贈之鄰羣兒盜園笋見之曰可徑取毋驚惶也衆議開河鍾瑞捐資獨濬之